

四庫全書

集部

欽定四庫全書

吳郡文粹續集卷三

明 錢穀 撰

學校

平江府修學記

鄭億年

上之紹興十四年春詔以工部侍郎王公暉為實文閣直學士出守平江既至吏以令白請謁先聖先師于學顧瞻咨嗟曰夫學不可廢于時而士不可以不學其來久矣傳曰家有塾黨有庠遂有序國有學此三代之制

也百世取法焉今蕪廢不治如此使民無所瞻仰因陋就簡漫不加飭殆守土者之罪也敢以不敏憚于改作于是闢而葺之講誦有堂休宿有齋至庖湍莫不有所經始于四月落成于九月吏不告勞民不知役而顯敞宏大首出旁郡且將請于朝給公田數十百畝以益其用使餼糧常不乏于是就學者日益衆矣先是上深惟天下弊于兵革民不得休息揆自獨志惇好鄰壤而邊鄙不聳乃即駐蹕之地建太學令有司討論三舍取士

之制萬幾之暇親御翰墨書孝經周易詩書刻之堅珉
頒之郡國所以寵異學者甚厚郡太守能不應僕志者
幾希其人哉學在府治西南隅景祐中文正范公所建
蓋熙朝極盛之時也仁宗方垂拱而視兆民之阜獨以
學校為先務而文正范公入輔出藩勲德並隆為世宗
工望重天下其所創立後之人詎可忽諸逮今百有餘
年矣值聖主綸建中興之治增光祖烈寶學公喚精白
一意以承休德且不敢墮文正之為鼎新學宮物議歸

重士之游息于此者思所以稱宜其人自勉勵期于有成金玉其相追琢其章以進德而修業彼頑鈍無恥集詬無節者曾不得容跡于其間使天下後世謂姑蘇為多士豈不美歟資政殿大學士朝請郎提舉臨安府洞霄宮鄭億年記

平江路重修儒學記

楊載

天下州縣之學莫盛于江浙之間江浙之間之學莫盛于吳前代之制州縣有文宣王廟而無學宋景祐間范

文正公守鄉郡始割錢氏南園地而躬為之又擇沃壤
為贍學田及公參預大政首為仁宗言詔州縣皆立學
然則天下之有學自吳郡始也後五十餘年當元祐四
年公之子純禮為江淮發運使因過家上冢疏請朝廷
復割南園地以益之由是學制大備當文正公立學時
首迎安定胡先生以為學者師自漢唐以來公卿大臣
才兼文武以忠孝著節如文正公幾何人哉自孔孟以
來為五經大儒能傳聖人之學唯河南二程先生二程

先生則嘗遊安定胡先生之門吳郡之學重之以二大
賢之遺跡後來郡守之有識者進謁祠宇顧瞻儀型躍
然于心未論他政事必以興學為先務建炎間烏珠過
吳學為邱墟紹興十一年梁侯汝嘉重建禮殿十五年
王侯喚繼造兩廡講堂齋舍承平舊觀至是盡復淳熙
十六年趙侯彥操增造御書閣五賢堂寶祐間趙侯與
憲盛有所增飭有元大德二年治中王都中以殿宇廢
久謀諸前兩浙都轉鹽運使朱侯虎慨然用其私財撤

而新之則又前此所未有也今僅二十餘年廟學之屋
俱有損者門廡牆壁日就頽剝今總管師侯始至奠謁
先聖先賢周覽徘徊嘆曰是學也嘗謂天下之甚盛幸
今未及大壞承事在予不亟修葺以遺後人他日必用
力百倍其困弗能之矣謂非予之責不可也于是木之
朽者悉易之牆壁之缺者悉作之廟瓦破漏者多盡代
其藉之之物而更覆之增飾塑像而新其藻繪始事以
四月十二日卒事以五月二十八日侯屬載為文以記

之且曰必歷叙前人之有功者今日之事則毋庸過褒
侯意如此將以觀于無窮也載承命唯謹姑記其實侯
之他善政則不敢及焉侯之志也摠管托里圖姓師名
克恭字敬之寧夏河西人至治元年五月記承務郎前
饒州路同知梁州事楊載記

平江路儒學大成殿記

燕公楠

皇帝即位之初年首詔郡國敦學修廟越五年是為大
德二年戊戌秋八月平江郡大成殿成前浙都轉鹽運

使朱虎所造也三日丁巳郡侯戎益帥其長貳若屬詣
新廟行釋奠禮文武司之在郡者咸集諸生駿奔走執
籩豆六民聚觀謂有學未始有此侯成禮退顧教授蕭以
道陳紹佐曰偉哉朱君之績也毋忘盍記諸于是公楠
以朝命實來杭歸道于學二教授請記以道言曰學雄
浙右尚矣而廟不稱自宋紹興辛酉之歲建于今丁酉
三十七年矣終視其梁麗修之未之有改以道始至即
郡別駕王都中謀焉別駕曰是謀非郡士與他人所能

及也其朱都運乎乃約東嘉蔡延辛偕請焉都運慨曰
吾為吳人二十年未聞有為是殿謀者其數邪今日之
事先聖事也曷敢不力欣然援筆書重建字畀以道歸
示諸生盡驚復疑信半會都運有母喪浮言胥動謂殿
事格矣乃孟冬之日馳告者曰朱運使木蔽江至矣羣
工雲集即日肇役凡七月而舉梁舉梁之日去歲始議
之日也謂非數乎舊基三尺其棟不過十之今通為大
者五蓋嘗憑虛望東西諸樓閣歸然者無不及而翼然

者過之矣學乃以米廩之積為三門兩廡高下深廣悉稱其殿丹青漆堊之麗垣壁瓦石之壯無不可久是役勤矣微都運不及此而歛然不自功也記非都運意獨願得一言載侯意示學者予心諾之顧息恩未暇李侯戡來廟訖事復速記予辭不獲乃言曰聖人之道如天地父母在人日用飲食間無時或息者也嘗思有以自盡苟吾黨而有所不知不能媿已都運之為此不朽二三子忘之杏壇其忘之乎雖然廟自孔子所以為道非

徒壯其居也易于渙萃俱言廟廟者所以收人心之渙而成其萃夫廟高矣大矣美矣今之萃其抑猶昔之渙乎子曰薄于德于禮虛又曰制度在禮文為在禮行之其在人乎此子游之所傳習也東西匹士自通洙泗上附青雲袞冕萬世非二三子之東家與誰謂華高企其齊而尚其自厲以一洗荀卿子子游氏之儒之誚則為無負都運新美之功郡長貳勉勵之意以式克欽承聖天子之明詔而廟不朽矣十月望日立資德大夫河南

江北等處行中書省右丞燕公楠記

觀德亭記

王景齊

歲在柔兆執徐孟春壬寅節齋觀相趙公先生再鎮吳門報政之正月以是日行鄉飲于郡學粵四月壬午合鄉射于學之圃禮也古卿大夫射必先行飲酒之禮飲所以序長幼射所以觀德歟夫揖讓而無所爭不中而不怨勝已惟有德者能之由其安行乎恭遜之節習熟乎和順之體者有素也不然血氣之性能無爭物欲之

情能無怨乎故三揖三讓昭其敬五豆六豆昭其等也由是而貴賤明隆殺辨則以之備志體之正直持弓矢而審固爭且怨何有哉然則先飲後射古人以此觀德行而亦世教所關歟吳故泰伯之國也莫大于天下而讓者三其去揖升下飲之爭遠矣厥後二千年間忠信之教雖微而禮遜之士不乏我朝文正范公始建鄉校古道復振嘗自謂曰士當先天下之憂而憂後天下之樂而樂被其教者寧復勝已為怨乎先生憇棠陰于袞

繡之鄉德爵無嫌于范公而政教有加于往昔猶念風
漓俗靡浸不如古思欲一變而還其初謂學莫先于崇
化而道莫易于觀鄉既咨郡博士四明林君潛考經定
式備諸郡之彌文復命幕屬趙君孟憲王君次丑聯事
合治摠庶務之靡密前期舍菜于先聖先師越夕會鄉
之耆老暨大夫士齒于飲所以撰禮延至憲使弘齋包
公恢庾使雲岩洪公燾而先生實主之三行百拜觀德
一新且班教給費命諸邑倣行如郡庠威儀盛美矣林

君曰古人射禮必繼鄉飲之後蓋有為也可舉一廢一哉撤射亭而新之俾佩衿遊于斯習于斯無何決拾既閑正鵠命中君曰可矣乃曰請蒞射先生後為之集衣冠合臺府旗旄戾止立司馬射人以節其進退之儀雖離于于升降以叙發彼有的行同乎賓筵舍矢既均藝修乎行葦先生喟然曰禮無古今歟何轉移習俗之易也射可以觀德信矣遂大書二字以扁亭蓋與吳學相為不朽也噫先生之化宏矣士當何如哉是必味繹志

之義學采繫之節孝弟好禮篤學稱道無媿于矍圃揚
解之言可也他日試于天子之澤宮而中者多與焉盛
豈直進爵益地為先生榮哉當知士者民之表也禮者
化之樞也昔文翁招子弟立學官而蜀郡化于文韓延
壽命諸生執俎豆而潁川化于禮矧吳素號文物之邦
既辱賢師帥作成之又得名師儒講行之目擊心喻俗
其不古乎嘗謂世固有言政而不及化者未有化行而
政不修者也先生下車以來蠲散糴以甦民錄巨奸而

戰吏行兵而增備核賦以寬征政之大者無不修此化之所以易行也雖然風動教化用之鄉人用之邦國一也先生豈又私于鄉校哉挈斯世于三代之隆特一飲射之推耳先取先生作棟梁指日事也其次乃及桷與棖廣丈二幙何遜焉景齊吳人也且受之師門偶綴末班弗獲聽政役幸前廡諸君有請輒誦所聞以詔來者云門生朝議大夫軍器少監兼權金部郎官兼資善堂直講王景齊記

重修大成殿記

鄭仲熊

郡邑置夫子廟于學以歲時釋奠蓋自唐貞觀以來未之或改我宋有天下因其制而損益之姑蘇當浙右要區規模尤大當建炎戎馬蕩然無遺雖修學宮于荆榛瓦礫之餘獨殿宇未遑議也每春秋展禮于齋廬已則置不問殆為闕典今寶文閣直學士括蒼梁公來牧之明年實紹興十又一禩也二月上丁修祀既畢乃惕然自咎揖諸生告之曰天子不以汝嘉為不肖俾再守茲

土顧治民事神皆守之職惟是夫子之祀教化所基尤
宜嚴且謹而拜跪薦祭之地卑陋乃爾其何以揭虔安
靈汝嘉也不敢避其責曩嘗去此彌年若有所負尚安
得以罷輒自恕復累後人乎他日或克就緒願與諸君
落之于是謀之僚吏搜故府得遺材逾千枚取贏貲以
給其費鳩工庀役各舉其伍幾月訖功民不知與像設
禮器百用具修至于堂室廊序門牖垣牆皆一新之無
復兵火凋殘之像既而公求去甚力士子德公之賜陰

圖挽之者計百出不果仲熊客遊之久嘗從公廡下壯其閎偉徘徊不能去退而竊有述焉夫樂因循而重改作最天下之大患當承平無事法令備具上下恬嬉往往負材抱藝之流欲有施設亦無因以見若艱難多故雖賢智馳驚猶日不暇給倘復一切苟且則浸淫跖弛無所不至矣自國家兵興之後天下廟學塵塵有之類因陋就寡者以為迂濶不急之務漫不加省縱有意吾黨事者猶縮手畏避不敢為蓋嘗深鄙焉惜其不振也

去年夏邊郵繹騷朝廷以此邦江淮之衝亟起公琳館以鎮撫之下車未久一境晏然廼獨以學校為急除舊起廢以飭祀典且修文正范公安定胡先生二祠以為邦人之勸公之用意至於如此可謂知所先矣此役也雖未足以窺公規畫一二然使為師帥者率以是為務吾知其有廢皆舉何事不濟哉故叙其實以告來者且系之以詩曰巍巍夫子道侔天地久而彌光于今奉祀中原雲擾俎豆靡餘旁風上雨以窘厥居兩楹之奠鮮

克中禮弗恭弗蠲吾道是恥玩歲愒日孰為經營奕奕
斯廟非公莫成神棲孔嚴遂還舊觀戕戕儒冠載瞻咏
嘆維昔僖公實修頽宮千載相望蔚其高風倚歟斯舉
能使吳重我作此詩以繼魯頌

尊經閣記

楊載

宋康定間吳學始造六經閣請浙東帥張公伯玉為之
記以屬其佐曾公鞏文成置弗用伯玉自為之曾鞏歎
服其文傳天下至今淳熙間郡守趙彥操即其地改造

御書閣有元大德五年東海有颶風之災閣碎為齏粉
延祐五年鄧公文原持部使者節來勉勵學校誦伯玉
之文歎是閣之不復見也則語教官陳君伯曰吾聞吳
郡學租頗多苟畢入無負以之贍士不寧尚有餘也取
以營閣則前賢之遺跡不終泯矣陳君克己自勵敏于
應事往時學租之不可責者唯陳君能責之由是聚米
如山倉廩皆溢明年鄧公復來以此責郡守宜奉行詔
書興起學校檄郡幕官之長使董凡役事是時為郡守

相繼則必巴實侯及曹侯晉幕官之長則李君仲英也
屬議咸曰嘉定義士沈君文輝以漕海有功拜忠翊校
尉其人樂于施捨為鄉里造學又割田以給教養之費
強力有幹習于工役之事遂具禮以聘焉沈君承命惟
謹台大匠陸文隆與定制掄材李君屬徒以會其役舊
閣前距大池僅半步後迫明倫堂巍然為屏蔽雖正晝
陽景不下燭居常憤憤然稍北五十步當止善堂之後
有亭曰聽雨有堂曰傳道移構稍北二十步即其地造

閣三間兩翼三簷二十八楹為高八十尺東西一百尺
南北五十六尺倚檻而望郡郭之內浮屠老子之宮雖
樓觀相連凌虛特起然而其勢皆詘伏在下無敢與之
爭為長雄其剏制也奇偉如此屬役方殷曹侯移守昆
陵師侯克恭承之凡六閱月而閣成七年六月之晦是
其成日也用中統鈔千五百四十錠有奇米五百五十
石沈君所捐以相之者復二百錠府中嘗意其用財之
泰也使吏復其籍迄無毫髮負由是師使加禮于陳君

而稱之以為賢蓋往時之為教官者多矣歲租所入悉之以贍士恒有所不足陳君在官四年已建是閣復修大成殿重造明倫堂學廩恒充物有餘不賢而能之乎沈君亦以此義聲聞于東南師侯不滿秩被召為京尹而趙侯鳳儀承之謂宜加功土木而中輒已久侯悉董而成之又增置外垣地五百四十丈環植松栢萬餘株為屋以周于四阿經史子集各以其函櫝刻以金石絲竹匏土革木八字以識之又大書尊經閣以揭于楣間

壯麗特絕與閭相稱善後至此侯之力也已至屬筆于
載使記其顛末由部使者郡守之賢下至于教官有功
于學校並著不忘傳之永久所以勸也藏經于此將以
為學者之資不愛厚費建立非常將以寓尊崇之意使
學者觀之而興起之也不然是徒擁虛器營締雖勤復
何補哉學者其慎思之至治二年良月日立

新修平江路學記

柳貫

吳郡有學起范文正公而學有教法起胡安定先生當

是時天下固未有學蒞教事者以禮聘不以選授學非
常有則甚重矣其後文正公上天章閣十事仁宗慨然
命天下郡縣皆立學又取安定學法為太學法學校因
得著為令至于今不廢其端蓋自文正公發之而吳郡
實為之權輿焉吳大邦也生齒之夥賦入之饒視他郡
或相倍蓰朝廷常選重臣畀之司牧其任弊獄訟詰憲
禁愼簡稽時貢輸疲心力于簿書期會間日恐弗給非
才敏用裕者尚安有餘智及于學哉故觀文教之廢舉

而知郡政之弛張于吳為尤切矣乃至順二年冬彭城錢侯光弼自大梁移牧斯郡至之三日以故事修禮于先聖先師顧瞻堂庭荒第弗治退即教授趙晉之問其故晉之曰比歲吳田敗于水廩粟之不贏二三吾興土木其將疇資公能責其逋租而視其不可緩者葺之學得不毀而功則有繼侯曰然為擇謹敏吏鉤校計簿而督其當輸不輸者得中統鈔五十餘錠侯曰以是濟弊不猶愈于已乎既撤仰高采芹二亭而一新之乃相禮

殿講堂門廡齋館及尊經閣先賢祠易撓腐為堅良化
剝缺為麗密而以其餘力築垣墉維一千五百尺侯曰
此如痿廢之人形稍立矣使天幸賜一稔吾當嗣為之
明年歲則小熟侯益節浮緝首議以講堂西閒屋曰
成德堂者改祠先賢自一瓦一椽皆革其弊故而為新
美迴廊繚如觚棟翼如制雖由舊而功則倍于經始又
謂靈星門實備臯應之制宜高抗而不宜卑陋掄材庀
工重作三門六扉以壯禮容塗墍壘腹擇于度而止凡

所經營必諦必審圖為可久毋徼速成厥既僇工釋菜
于先聖卒徹觴客貫時與在賓席學之師生揖貫曰自
侯之至歲屬薦飢詔傳沓來符檄叢委人謂侯將爬梳
綜理之不暇而暇加意于學侯則不然凡所以惠綏吾
學者愈于整暇之時今考成有薦薦已有宴子實執爵
以酬幸為我著之以示方來嗟乎不可必得者人之時
而可以必致者人之才時苟不偶則挾強忍之力濟通
敏之才亦何事之不立而何為之不成方庚午辛未間

吳中道殣相枕藉大家巨室困于征需而丘民之自能
拔于溝瘠者百無二三侯之授節南來遽承其餘此何
如時哉侯既殫慮畢智為之勞徠安輯而天終祐民克
相有秋吾黨之士言觀魯侯之樂樂飲在泮之酒尚論
學政而知其不屈于時以能為所欲為者才也才敏則
用裕廢者可舉弛者可張才豈能幸以致之哉吳故禮
義之區自秦伯逃荒端委以治周禮為教始立于游北
學聖門因文學以得聖人之一體而教滋以章下逮文

正蓋去之千有餘年立朝大節光明俊偉先憂後樂終始是心守郡而建鄉學立師而得安定知孫明復張子厚之賢而開之以學問文正之學聖人之學也然則濬吳學之淵源鼓士氣之橐籥而使之強于為善者侯之志也是可沒而無傳哉因併識之以諭多士四年癸酉秋九月壬辰建太常博士柳貫謹製

重修平江路儒學記

鄭元祐

維吳有學肇自文正公名父子更宋南渡而吳之文廟

與學宮始大備至國家大一統興學勸士累詔郡國六七十年之間所在學校誦聲相聞顧吳為東南雄藩學校興于范文正宜特盛于東諸侯然更頻年郡非不大也而土力實耗于往時民非不多也而貲力實罷于昔日則夫學校之教禮樂之文亦有所不逮也事稍上聞廟堂慎選守臣而燕人吳侯由彰德路總管仍授大中大夫即拜平江中書遣使以堂帖賫起馬璽書得乘驛南下用示特恩既至首謁大成殿仰見殿脊勢將傾圮

甕桶歌塾欲壓尊像自聖師以下彩繪黜剝窓戶闌楯
髹漆舊暗侯乃惕焉疚心即裒稽羸節冗濫悉徵每歲
廩入之畸度積可敵費乃鳩工庀材一新禮殿并兩廡
戟門自聖門以至從祀諸賢袞冕圭珮五采煥發如日
麗天重建外門揭示文廟采芹亭官臣之所戾止也至
是亦一新之禮殿前舊設樂軒久撤去迫近香案殊失
廟貌深嚴之意侯命復之雄渾沈沈而廟益以邃密僉
謂吳學自數年來支柱庫傾苟遮目前率多具文無教

養之實豈若侯誠慙一忱興學養士為己任哉乃礮石
紀辭以章侯修舉廢墜之實謹按中吳自秦伯端委以
臨其民其後子游生于海虞乃能北學于聖人之門風
氣既開賢者輩出由其山川之秀不可閼若夫庠序之
教則尚未大備也至范文正雖生長北方及歸典鄉郡
深惟桑梓之故莫先學校之教由是大興吳學今宋社
已墟而學宮成于公父子者迄今不墜雖其間張弛有
時不同然閱久而人心愈益嚴重則以公父子里閭之

故也今侯敬歷中外而以才望為吳守臣其潔白之操
豈弟之政要其心不以文正自期待者固不能若是也
因紀侯修學之實而侯之德美因牽連得書謹記至正
五年歲乙酉十二月望立石

建大成殿軒記

周伯琦

東南之學校莫盛于吳會矣學之有殿以崇祀也殿之
有軒以合樂也殿作于大德戊戌修于延祐戊午聲容
叙秩每病其隘蓋將七十年矣郡守海陵王侯時虔奠

謁惕焉于懷爰重改作誕謀恢益廼乘露臺伉南甕而
增作新軒起手于至正二十六年丙午之歲四月至七
月而訖功其制三間中廣二丈左右各殺三尺四寸棟
隆二丈七尺六寸深殺隆一丈一尺藻井中帶八觚齊
綴金鱗錦羽蛟拏鸞騫文版夾覆五米輝絢遐睇山立
仰瞻雲升軒以殿崇殿以軒邃體勢宏麗庭陞肅嚴于
是簾業之設鐘磬之縣琴瑟搏拊之陳簫管笙箏塤箎
祝敔之列秩乎其倫粲乎其章登歌合聲協律諧節以

達薦饗以熙獻酬陟降旋折綽如裕如所以昭格欽報者儀文咸具然則新軒之作其可緩乎先是以版為軒風雨摧撓隨時葺理至是撤而更之王侯視事之初軍旅未戢供億百出獨能以興學校為治民之本勸農儉用抑浮尚質獎掖師儒廩餼周給經生充貢黜庶向慕首戒弟子肄大成樂既而營度工材不貸于官不漁于民一瓦一木必庾其直故是役也不日而成又以餘力繕完東西兩廡易其飛欄木版之朽圯者凡聖賢大儒

塑像歲久黝昧則重繪飾之靈星戟門形牖一新學政
序舉先後適宜議欲廣厥學宮講堂齋館旁室叢庄器
用悉如規度期以德禮風化提封不徒屑屑于政刑之
末如世俗之能吏而已於乎詩書禮樂四代之學所以
立教淑人者也詩言志書紀事誦而習之博文力踐禮
之節以經邦紀民樂之和以移風變俗其功用廣矣大
矣釋奠于先聖先師尊其道報其德禮之隆者也翕五
聲六音以致敬享貫神明章教化樂之殷者也古者典

教用樂故樂正崇四術立四教以造士升其賢秀材而
官之內則臣功外則民社以是成已以是成人馴致雍
熙而人人有士君子之行王侯之有功于學校其以古
道自任者哉殿軒之作雖一役也可以槩見其政矣校
官貢穎之傳著請文于石以憲方來乃述其成功俾職
教者知夫作軒之始侯名椿年壽伯其字也慈祥而惇
義勤敏而篤仁由郡倅二三遷為都轉鹽運使最勞擢
郡守不離郡者八年民戴之如召杜云是歲七月既望

記時董工者平江路吏蔣德潤崑山州吏陸志道也資政大夫江西諸道行御史臺侍御史鄱陽周伯琦撰

宮牆記

魏俊民

吳郡之西南偏孔子廟學在焉廟居學之左繚以宮牆九百餘尺舊學築土為之雨淋日炙弗克堅久教授徐震學正徐昭文學錄邾經一日相與慨然曰廟自舊宋以來迄于今三百餘年而宮牆之廣歲必加墁飾始免頽圯計其費幾萬貫矣殆不為浮費耶乃謀易以磚石

為悠久計即言于監郡六十公經歷白公樞二公曰是
吾志也爰命教授偕府吏劉鼎計工度程躬董其事其
費一出于廩粟歲用之餘不虧于公不損于民墻之基
內外為石三層凡五百七十丈其袤九十五丈高盈丈
而隆其三下廣殺高之數丈有六寸上廣如下之數而
又殺十之三磚一十五萬瓦三萬九千六百役傭二千
三百他物稱是用粟一千斛始事于至正十五年之六
月告成于其年八月工既成典教者俾俊民記其顛末

謹按吳學肇基于范文正公更宋南渡而其制始備至
我朝崇尚文教詔興學校而宏敞偉麗遂為江浙之冠
廟宇堂廡齋廩食廬靡不完美獨宮牆之制未備因循
于百年之久累葺而累壞非虧一簣之功與一旦鳩工
聚材撤而更之高廣堅厚一如矩度歷數百載可弗壞
雖事之興舉有數要非郡監之言參佐之良教官之多
才亦未暇理此俾後之人仰數仞之高咸指而言曰是
某守郡所成也是某教授所營也豈不足為方來者之

勸云是年冬十月甲子立石

添助學田記

謝南

國家駐蹕錢唐吳為股肱郡涵濡文教人材日盛校官
養士歲費益廣宜以不足聞也嘉定戊寅判待制趙公
彥楠出在官之餘田三百畝歲可得米二百石有畸以
助經費且作簡謂冷曹曰養成美材為明時須旨哉斯
言公之愛士乃所以愛國其仁豈有既哉是秋提刑攝
府事即今右史王先生斐也叅稽前比弛其征入由是

學宮益沾全惠而終始贊其決者僉判趙君與憲為有力焉南不才分教蒙此巨助幸迫終更何敢沒其實用叙大畧併與公帖存之庶幾來者有攷云謝南記

吳學義廩記

戴溪

東陽倪千里起萬以紹熙癸丑分教姑蘇始至計糧食不足以養士攷核宿弊學有羨積增養士貲彬彬咸集矣起萬慨然曰學校義之聚非徒養士也事關風教非學校誰實主之顧財力不可為爾漫不度贏縮侵費養

士曰我將為義是又好名者過非吾志也因以告諸部使者今右司郎中黃公適得廢寺沒官田餘一頃先有佃學田者多取贏或不平爭之訟久不決黃公歸其田于學使自為官庄視舊額增米三百石合前所得田為米三百五十石有奇起萬曰是可行吾義矣請隸職于學者九人使得學正錄錢糧官同主之因定其規約歲取其入祠祀范文正公及教養其遺三人士有入太學與薦名登科第者助其費有差文武士宗子皆預焉止

至會拜春秋釋奠其與行禮者凡費于此乎取又將斥其餘以助士貧而親不能葬與嬰孩之遺棄者約既定學以其議上于府守王公慨素盡心學校與合府咸稱善俾刻諸學宮與後人共守之起萬以書來求予文為記余嘗掌教湖學意有所欲為力不能給也起萬顧能之余誠愧焉夫事非始創之難而善終者不易也其始創焉者徒有是心因人成事未足多也萬一有後之人謂議不出已而忘焉則廢事非急務而忘焉則廢歲脩

月削則漸不可繼廢左兌右易則苟違目前廢雖規約
縷縷大書深刻無益也後來者不忘前不怠後益增廣
之使為可繼謹守成約雖甚急不易兌此非信義君子
慈祥勤篤平心無我未易及此余是以知善繼者不易
也然姑蘇之學為天下最素擇能文士有行義學業者
為之師固將由是推而大之非但善繼而已如前所云
特淺之為過慮爾起萬且受代書來益勤故以其說質
諸來者而以規約載于下方云慶元丙辰元日永嘉戴

溪記

蘇學復租田記

何林

景定初元庚申之臘林來庀吳泮時農扈告登先兩月
已納稼交印之日廩有餘粟獨所謂長洲縣陳公等鄉
圍田一項民頑罪歲弗即輸而餉所急之符旁午于道
適舟運水溢至移他租折金納不受攬家于京口糴客
米應期限土人豈知此哉迨辛酉秋大水吳門上腴淹
沒大半學田低下訴滯者日相環也圍田又可知矣諸

友相顧愀然曰使餉臺不恤尚可移他租乎涉暑糧絕折助于臺府生意漸春諸友又曰雨巖先生吾黨之元氣也昨歲持節過吳謁夫子殿拜先公芳刻下顧瞻槐杏之陰徘徊若不忍去青青子佩豈不在公懷抱間盍請諸林曰請粟者有限之恩歸田者無窮之利衆曰唯遂退而裁書越五日而書徹又五日而報下又浹旬而公牒頒霜鐘之感不如是之速也然先生不以吾士病吾兵方且搜括他租以五補一而後撥其用心何如哉

昔庠校之得是田也歲大熟時固不為無補五七年來
飢饉薦臻往往移他租以輸餉所今先生能移他租以
補兵食移餉租以給士食使兵無減租之慮而先生得
以遂移租之仁士有增租之喜而庠校永免移租之害
一舉而兩得之顧不偉歟且農士兵之分其殆起于田
之不井歟成周盛時度民以授田其秀者為士勇者為
兵旅卒兩伍之衆即比閭黨族之所聚出塾而耕荷戈
而戰周旋乎同井之田薰染乎同門之訓養之所至教

亦至焉是士與兵之養一出于上今兵食皆仰給于縣
官上之人惴惴焉惟恐其不足而士則自養而自學甚
至于去里巷背父兄流離顛沛有不能以自給者猶幸
而郡縣有學又以食不續而員有限毋恠乎士風之愈
不古也公以兵食為職又能以士食之不贍為心其得
周官井田之遺意歟雖然良法美意待人而後行吳學
之興經始于文正范公典藩之初恢廣于恭獻公持節
之後今先生篤念先正振鐸之地增給吳泮贍士之租

僉謂先正養心先生即昔之范公先生即今之恭獻也
公節溪人名勢卿字安道自號雨巖以摠餉奏最陞直
華文閣除畿曹提學事又諸生之一幸也諸生德公之
賜請勒堅珉以詔後世于是乎書景定壬戌重陽日廸
功郎特差充平江府府學教授何林記

平江路儒學祭器記

李淦

大成殿祭器者教授李淦方丈豹所造也金屬大尊二
山尊二著尊二壺尊十有二像尊如壺尊之數罍四洗

四勺二十爵百七十有二坩二百有二豆三百四十有四簋百二十有六簋如簋之數爐一缶二槃二十有四竹屬篚十有一籩三百二十有九木屬俎五十有五餘仍舊貫初至元二十有九年十有二月望淦祇事顧茲器非度明年考朱文公釋奠釋菜禮改為之十有一月方君來明年偕方君為之元貞元年十月竣事首尾凡三年鳩工更學正凡五人費伯華林桂龍白淵唐天澤朱鳴謙凡四人楊如山洪焱祖文一覺俞真卿會記更

直學凡五人潘梅孫計志道魏埜沈伯祥齊國俊費中
統鈔凡四千貫有奇而後成蓋難且久如此後之人尚
敬守之哉盱江李淦撰嚴陵方文豹書

蘇州府重修孔子廟學碑

宋濂

蒲圻魏公守姑蘇之明年鉏暴樹良德綏化宇上下洽
和百廢具興孔子廟學顛危弗治顧瞻良久喟然而嘆
曰皇帝大興文教詔頒明經六藝諸科嘉惠多士將以
人文化成天下今弊陋至是非所以重承上意公即捐

俸為倡唯興修是圖其僚屬與郡之人士驩然而趨功以廟言之宮殿修廊敞以靈星之門以學言之講堂中居兩廡相向挾以六齋以達于前門至善之堂尊經之閣又巍然而聳其後向也棟撓級夷黦昧而無輝今焉丹雘炳煥簷牙而翬飛已而泮池有梁采芹有亭先賢有祠亦皆次第就緒而公拜蜀參政之命將之官有旨還守姑蘇民大欣慶公復命補其墻墉四千八百尺有奇唯廟學之前乃吳江甯開之園局于封畛處迫殊甚

至是從化盡以其地六百尺入于學宮始獲闢門于前
用正地勢內厯洗馬來秀二池架梁以通往來外臨康
莊左右有坊曰狀元畫錦其嘉名符契若有開必先者
閣後之地奪于比鄰公察知其奸稽官書以為証比鄰
詞服其地乃歸又懼遠而或湮也遂圖學廟四疆勒石
志之始事于洪武六年正月甲子訖功十一月較之承
平舊觀或有過無不及焉公帥其屬執豆籩醢以
成功告觀者莫不咨嗟自兵興以來學校所在蹂踐為

墟而姑蘇幸僅存非公之至幾何不與之俱廢乎教授
貢穎之既宣力始終復使訓導張田請記其事以垂不
朽惟蘇之有學實始于范文正公蓋公景祐初出守鄉
郡遴擇南園請于廟而建焉為其師者則安定胡文昭
公也計當時人物固嘗盛矣數百載之下仰其聲光慕
其風烈每使人發不可企及之嘆自時厥後雖有賢愚
學之興廢靡常二公過化之地流風遺俗終未泯也况
今遭逢有道之朝得良二千石為之師帥豈徒然哉然

公興學之志不下范公者也則夫坐臯比而談經藝者
其必將取學于文昭乎明體適用之學吾知駸駸然向
盛在家則孝于親出仕則忠于君而無負公興作之意
苟不務知此摘英擥華而為譁世取寵之具非區區所
敢聞請以是刻之鹿牲之碑蘇之人士庶幾知自勗哉
公名觀字杞山碑為修學作前代興造各自有記皆不
書系之以詩曰姑蘇之墟有川漣漣折趣南園匯而東
沅靈氛中啟煥爛弗収自非聖師疇協其休昔有哲人

出綰郡章乃構學宮乃建廟堂學宮煌煌廟堂洋洋矜
佩將將來翔來翔盛衰相因揆理則然風摧雨蝕上漏
旁穿矧丁難虞烽火相連誰一舉臂持危扶顛大明當
天九服同光攬搶斂翳奎壁吐芒眷我魏公來泣大邦
屢形于言我敢怠遑既率部封復登府僚分勞授事具
乃教條曾不一期厥功孔昭化此朽腐鬱為峇堯孰敦
化原孰築教基孰脩民彝匪學曷為我語蘇人公豈爾
私耳目苟具必致其思思之如何法孝與忠二者無媿

行將天通震澤有石其堅比銅史官勒詞用昭永終

蘇州府孔子廟學新建南門記 王彞

惟蘇州學肇基于范文正公父子學之左別有廟而靈
星門南不十數步即畫于鄰垣于是旁趨東偏以為門
而地勢荒塞大弗稱蓋鄰垣之地廣袤若干畝在宋為
錢氏園及元而業更甯氏先後為郡者屢欲拓之然不
可以力得至正間郡守六十公乃以學廩之羨貿其地
與甯開得其三之一暨入國朝前國子祭酒魏公以正

學碩德出守茲土政修令行大修廟學而宏博壯麗實踰舊貫未幾開說公化盡以其地歸焉公因命教授貢穎之繪圖而經營之郡人士願出私錢以助乃通道自櫺星門以極于南城之塗凡若干地故有洗馬池適當其前又有狀元晝錦兩坊適拱左右遂表文廟之道于洗馬池南而架梁以入其道南北之半故又有假山山之陰有池曰來秀其水自太湖入南城之池注之來秀自南流則匯之洗馬而止其北流則歸學之泮池

而止又即來秀池南闕假山遺址為門以正南面焉至是而廟也學也出入之道殊矣故入其門則循池之東以趨于廟出其門則折而西又折而北為梁渠上者再以達泮池之梁始趨于學示神人之不可雜也方廟告成翰林侍講學士金華宋公既為之記頴之以為此一役也范公所未得為而魏公乃得為之始終幾三百年而廟學大備有不可不特書者爰以狀使彙記之彙也幸從公游不敢固辭于是具書公建門之績與歸地始

終俾刻焉至如孔子之道萬世遵行者孰不知之茲不敢勦說而瀆言之也門之新作在洪武六年正月甲子至十月丙申落成糜錢若干工役若干魏公名觀字杞山武昌蒲圻人世之學者皆稱之曰蒲圻先生云洪武六年歲在乙卯春正月丁卯朔會稽王彛撰

蘇州府重修儒學記

胡儼

姑蘇東吳大郡也學宮又東吳之冠也五十年前余嘗至其處而周覽焉喜其地勢之廣衍而惜其堂宇卑俯

有弗稱也時典教者對余徒有興嘆而已今年秋九月
教授豐城何澄校藝還自閩述其郡守况侯伯律興作
之勤求為之記大成殿及兩廡作于正統丙辰明年作
至善堂作後堂又明年作明倫堂作齋舍作射圃凡為
屋百間度材庀工載石陶甕與夫經費所需咸得變通
之宜越三年而役成高明壯觀曷超于昔丹碧輝映光
彩聿新况侯之奉揚文治以淑邦人者于斯盛矣而師
友之朝夕相從得以依乎廣居以安其息游以移其氣

體者何其幸耶學宮之建久矣唐刺史李栖筠始增置學廬至宋景祐初范文正公典鄉郡嘆學政之廢因州人朱公綽之請上其事于朝得賜田五頃乃割錢氏南園之地以建焉初公得地于南園將徙居術者謂世出公卿公曰與其貴吾子孫于一家孰若吳士之多賢也遂以其地充學宮延師儒教育生徒而安定胡先生首居之嚴師資立教條經術治道明體適用之學表見當時實肇于茲而文正公之嘉惠斯文其用心不亦仁且

廣乎今況侯協謀侍郎周公重為興建蓋亦聞文正之風而興起者歟大抵國家以育賢為致治之本賢者以務學為致用之資而守令又所以承流宣化者也夫為政者既能盡其職矣而士君子之居業于斯者可不知所務乎必也息紛華功利之心以求夫聖賢之本領盡切磋磨礱之益無忽乎師友之講明由是以德行尊顯則禮義興而風俗厚以經術進用則心術正而功業著矣況侯余鄉人也其善政既已誦于吳人而斯舉尤為

知務故樂為之書俾來者有所徵焉正統四年二月初
吉前史官國子祭酒兼翰林侍講嘉議大夫太子賓客
致仕豫章胡儼撰

重修蘇州府廟學記

金幼孜

蘇為東南都會學校人材實為諸郡先昔宋景祐間范
文正公仲淹請于朝始建先聖廟學于吳蓋割錢氏南
園之地而為之者也荏苒三百餘祀薦厯兵燹屢興屢
廢而比年以來其學舍文廟傾圯漸不可支永樂甲辰

秋臨江陳孟浩來典教是郡顧而嘆曰學校風化之本
乃不振若此其何以稱仰崇以作興士類遠監察御史
李立按治吳中孟浩以其事白之乃力贊其成為裒大
家富室之有力者俾出金穀而協助焉孟浩復與訓導
馬壽錢紳韓陽各捐已俸以為之倡于是鳩工庀材首
新大成殿增飾塑像次新明倫堂旁飾齋廡室廬次及
池橋亭檻階阼垣墉靡不繕完是役也工不勞民費不
出官而歸然更新于一旦之頃往來者但視其成而不

知其所以成也孟浩請予記其事予不敢辭則為之言
曰學所以明人倫人倫不可一日廢學校其可一日廢
邪士游于其間其理則仁義禮智其器則君臣父子夫
婦長幼朋友其文則易詩書春秋禮樂若是者豈徒托
之空言蓋欲明其道以充其性密察于幾微致謹于踐
履積累以至乎浹洽擴充而極于廣大此則學之之要
而所以成已成物者不外是矣吳素稱禮義之鄉宗工
鉅儒先後相望他未暇論有若吾文正公之清修博雅

大章事業光明俊偉至今為天下後世重士生于斯游
于斯必取法于公無眩于邪說無奪于利誘充其內以
達于外他日出而臨民則思為良吏立朝則思為名臣
真履實踐以求無負于所學無愧于先達則吾孟浩所
以拳拳于斯文者豈空言而已哉因悉記其事并書其
說如此俾歸而刻諸石且以示後之典教事者尚思自
勉以繼于無窮焉是為記宣德五年歲在庚戌三月吉
日資善大夫太子少保禮部尚書兼武英殿大學士臨

江金幼孜

蘇郡儒學興修記

徐有貞

蘇為郡甲天下而其儒學之規制亦甲乎天下是蓋有
泰伯至德之化子游文學之風安定師法之傳在焉不
徒財賦之強衣冠之盛也學之建自有宋越有元至
于我有明幾五百載其間廢而復興毀而復修惟牧守之
賢是賴其人在郡志可攷已然近自正統景泰之際國
家多故學寢以敝爰歷數政皆常有意興修而弗遂成

化初元今巡撫都憲瓊臺邢公之為守也因荒圖豐革
故圖新曾不期月百為具諧于是教授南昌程君蘭司
訓餘干張君憲山陰李君璞駱君吳協議以請于公公
曰是吾志也乃相舊規有仍有改而一新之若大成殿
若戟門靈星門若尊經閣若明倫堂則皆仍而新之者
也若先賢祠若會膳堂若四齋暨直廬若射圃若泮池
之橋則皆改而新之者也經始于丙戌之夏落成于丁
亥之秋凡在學者忻忭胥慶會邢公既升而巴渝賈公

來繼其政謂斯文盛事不可無記之者因率學職諸君來以為請予郡人也而有子在學于學之興修亦同其慶焉乃進諸生而語之曰夫學之作興在乎君長化導在乎師儒而進修之功則在諸生之自勉焉爾凡為學者所以學乎聖與賢也學乎聖與賢者蓋將希至乎聖與賢也希至乎聖與賢者而可苟哉其必也由乎詩書六藝之文以通乎唐虞三代之道處焉進修焉而為之德業出焉施設焉而為之政事堂堂焉表表焉以立乎

天下若陸敬輿之于唐范希文之于宋庶幾哉始而希
賢終而希聖不惟其言惟其行不惟其名惟其實窮維
斯達維斯憂樂維斯成于已也惟斯成乎物也惟斯使
世之論者謂吾蘇也郡甲天下之郡學甲天下之學人
才甲天下之人才偉哉其有文獻之足徵也斯于作興
化導之意為無負矣

蘇州府重修儒學記

王直

國家稽古定制建學立師以陶鑄天下之英才使名成

一器而天子垂拱于上以收平治之功其義遠矣人生
顓蒙方其幼也苟無禮義以漸摩之逮血充氣盛慾實
漸開鮮不傷倫而敗度先賢之為政者緩于刑戮而急
于教養良有以也蘇為東南大郡土沃民繁家衣冠而
戶絃誦秦伯揖讓之風儼存然性頗輕脫開好爭訟亦
有夫差之遺意焉苟非學校之教提撕警覺又何以矯
其輕而歸諸厚哉學宮在郡治之南可一里許舊傳為
錢氏南園文正范公購得其地而創之歷年既久雖屢

經營繕卒未愜大方之觀今太守四明姚侯下車以來
政化大行毅然以修舉廢墜為已任視篆三日敬謁吾
夫子之廟而拜之次及四配十哲兩廡諸賢見其神像
歎側柱礎傾斜至有不蔽風日者慨然歎曰為郡者之
責也亟欲一新因白巡撫都憲萬安劉公巡按侍御南
郡袁公咸韙其言或曰年歲未豐人尚缺食驟興土木
之工第恐事未成而憂先至也侯曰不然吾上不虧府
藏之蓄下不庸科歛之財以義制事而身先之胡為不

可況此名邦寧無一二伏羲者而副我乎于是首出俸
資若干為衆人勸既而聞者四起爭先投刺惟恐居後
因命訓導周謚以董之斧者鋸者髹者塗者不期年間
厥功告成大成殿明倫堂兩廡四齋尊經閣至善毓
賢二堂道山觀德二亭靈星門學門儀門罔不修治復
彩飾聖賢及歷代諸儒神像築杏壇一區立狀元解元
二坊皆親書其扁徹文昌文正二祠移諸奕壇見者駭
愕郡之耆父私相謂曰吏不驚而民無擾何成功之若

是也教授臨川黎擴與予有鄰郡之誼走書謁文以紀
其事予自謝病南歸久疎筆研固辭之而不可乃勉為
言唐虞之世比屋可封無他教之至也三代以降雖沿
革不同其文獻猶有可觀者自秦罷侯置守為吏者止
知簿書敲扑而已尚何暇以歌青衿采芹乎侯之為此
度越前人遠矣侯名堂字彥容由進士拜冬官主事陞
郎中出知廣信累著能聲因丁內艱蘇守告闕都憲崔
公時巡撫江南每難其人方會議京師聞侯服闋立請

于天官冢宰而假之衆論稱屈崔公曰屈之者所以伸之也不遇盤錯利器何甄茲而果能稱其言而光闡之不趨衆向顯揚名教激厲風俗雖文翁造蜀豈是過哉吾知蘇之人材過此必倍蓰矣他日棟明堂器清廟楫大川必有勝其任者則侯之功豈可泯乎因書以告來者大明天順五年歲次辛巳冬十月吉旦資德大夫正治上卿吏部尚書前翰林院侍讀學士國史總裁兼經筵講官致仕泰和王直撰

修蘇州府儒學記

陸鈇

詩稱既作泮宮春秋書丹桓公之楹夫泮宮實修之而
云作者以見修廢之功擬于創制而一楹之丹孔子不
遺者豈非以尊室在所當愛哉蘇州郡學自范文正公
割南園地為之而規模始著自後好義之士尋源索本
往往歸重于茲故或為之增置齋閣或為之附益田租
開建恢擴日新月盛而豐碑大刻紀載鋪張者亦不敢
後焉其意豈不昭然哉國朝文制日興崇獎尤甚學宮

之侈殆逾百楹生徒之衆亦克稱之教化之隆于茲見
矣成化甲辰襄城張公邦鎮來按茲土視學之暇徘徊
顧瞻見其規模雖宏而朽弊相繼棟宇雖完而凋落漸
興以為天下之事為于其細者易為于其大者難與其
為于其難孰若為于其易于是審其輕重緩急之宜而
圖起廢更新之意視其可易者易之可因者因之晦者
飾之腐者剔之搖者築之經始于談笑之餘而陰益前
人之功成永固之業信哲人之為有見于幾先哉學功

告成而公以代去貳守毛公廷美實護其事觀成功之
難歎曰襄城公茲舉非徒上安神祀下悅衆心實所以
詔我後人而興起後學也蓋君子所重人咸重之君子
所忽人咸忽之公重于學校如此所以感發奮厲者已
在于不言之表且其規畫財用出于散漫收贖之餘而
選徒用人在三時閒曠之日事成而人不勞吾徒不知
所重焉豈理也哉于是伐石走書幣詣余求文其上予
時方負罪憂居謝不敢受而諸生皇甫信朱華道毛公

意慙懇諄複累累不已余曰古人大功廢業又曰三年之喪對而不問孤豈敢為毛公惜哉顧其情有未安而禮不敢違耳于是二生據余庭柱間相持者移日務于得請余乃重違毛公之命又感二生之專勤以為若茲者將安所處乎古人為邦君之命固有要經而從事者吾敢取以為口實可乎于是再拜而受之竊惟儲養樂育登崇俊良此上之所以寤寐而不忘者然勢不能周悉而憲臣者耳目所司所以延訪而博求者也張公

其知此者乎自余家居聞公修崑山學太倉學又修郡學三學賴以完整而生徒有歸教學得所張公之功也異時歌菁莪而咏棫樸者非公其誰與歸公能舉職毛公能承命不忘其艱是二公者皆所當書而復附予辭受之說者蓋其事關風教余苟得所處則諸生將領于余使其失焉必將以咎于余而余因得以自省豈不可乎故併書之為記

蘇州府重修文廟記

吳寬

蘇有學于城南實創于魏國范文正公更五百年來所以修葺而開拓者惟賢守是賴至于今日規模益壯天下之言學者莫能過之故四方賢士大夫之道郡中以一遊其地為快然猶病文廟與學之弗稱也蓋其制作非特視學為陋歲久且敝爾乃成化壬辰鄱陽邱侯霽來知府事政既克舉境內悉治嘆曰事神吾職也有如大廟敝陋孰任其過然吾未敢專也乃請于巡撫右副都御史洛陽畢公公從之則計財度工擇日而從事始

改作大成殿于舊址之北而侵于西者二丈有奇復作
靈星門南與殿直以甲午三月興工工垂完而報政于
京遂去任矣其年蠡吾劉侯瑀自監察御史超擢來
代政治益善視此舉非得已而前功所當繼也未幾殿
與門竟成既而若兩廡若戟門若神厨皆以次改作崇
卑廣陋悉合程度言言潭潭迥異舊規而廟與學始稱
矣他日知長洲縣劉君輝知吳縣文君貴暨教授林君
智合言于寬以二侯之功不可泯者願記之以示後人

嗟夫孔子之道大如天地與之相參高如日月無得而踰萬世之下被其膏澤者區區土木所能報其功邪而人復為此無亦盡所以尊崇之禮以免有司之過爾蓋比歲儒臣建請有欲加以籩豆佾舞之數者下羣臣議議者亦謂此不足為孔子輕重而朝廷竟從其請行于天下惟所以尊崇之者無所不致其極也詔下為丙申之秋適吳縣丞陶節長洲縣典史劉慶皆嘗承命董役以功完告及丁祭之期籩豆既陳佾舞斯列而棟宇深

廣足以有容觀禮者美之雖然二侯之意豈徒為是勞費以充郡中美觀者哉禮行于斯樂奏于斯致尊崇于斯固所以申其報本之私若夫瞻拜之頃廟貌尊嚴洋洋乎如在其上如在其左右豈無油然而興其希賢希聖之心者乎易曰觀盥而不薦有孚顒若二侯之深意安知不出于此且是廟之作凡以事神也惟夫前後之相濟彼此之無嫌而一出乎公其功遂不至廢推此道以治民此民所以同歸于治也歟寬故學之諸生也于二

侯無能為役因諸君之請敢忘其淺陋而書之初學門在廟街之東凡出入于學者必涉街以行邱侯以神人之分當嚴也顧旁近多居民民既喻其意皆樂徙去乃徙其門于靈星之西更為門于泮池之北以達于廟然後廟左學右截然以正後有賢守以廟學為事者其尚修之葺之以無隳其成功也哉翰林院修撰儒林郎吳寬著

宮牆記

何澄

我國家列聖相承深仁厚德洽于人心迄今七八十年之久而學校之政尤惓惓焉設風紀之官以專提督而郡守縣令尤必致意于是者于以體朝廷興學育才之盛心祇奉德意而不敢忽焉者也姑蘇之為郡密邇京甸郡之有學實宋范文正公舍南園之地為之其子純禮因其舊而增益焉自宋至今二百餘年郡守學官因其敝而輒加修葺號為東南列郡之冠正統癸亥巡按直隸監察御史錢唐鄭公顥行部至郡謁于廟廷顧

瞻宮牆頽毀弗稱乃謂知府李公從智購隙地而增築之未及數月百堵皆興數仞之牆嚴翼端正僉謂余忝膺學職宜述其事以示永久夫學校育才有國之先務然而作興振舉惟繫于風紀之司與夫守令之賢蘇之學近日巡撫侍郎周公忱知府況公鍾倡而新之至于鄭公相繼興舉又得今知府李公奉承惟謹始完以脩豈非貞元會合自有其時而斯文之在天地間未嘗一日而消歇與夫綱常之道所以厚人倫美教化者雖亘

千萬古同一時歷千萬人同一心也自今以始凡我士
子游歌于斯沐盛朝之化育瞻夫子之宮牆尚益思自
奮勵以毋忘君上之賜聖人之教與夫公所以率厲作
興之意哉若夫窺其牆而自謂不得其門而入不見宗
廟之美百官之富者可謂自畫者也非聖人所以為教
也非國家建學育才之深意也吾黨之士當與共勉之
牆之役經始于正統癸亥之秋訖工于明年二月董其
事者長洲知縣王瓘吳縣知縣葉錫牆以丈計六百三

十高盈丈凡費錢以緡計五百遂刻石以記正統九年
歲在甲子春三月吉日直隸蘇州府儒學教授劍江何
澄撰文

范文正公祠堂記

汪澤民

吳學之興始于文正范公此所以專祀公也宋景祐初
天下郡縣未有學公守吳請而建焉吳為公父母之邦
向得錢氏南園地將居之或謂是必世生公卿即以其
地為學宮公之子恭獻公持節過郡益新學給田由是

立祠禮殿後忠宣公恭獻公從祀尚賢報本典禮宜稱
至元再元年春正月鬱攸及祀屋幾毀明年文學掾蔣
君伯昇至顧瞻摧圯懼神弗居告諸郡守掄才木陶甕
瓦易撤故朽完補竦漏棟宇隆敞像設儼肅秋九月始
事冬十有二月工乃告成工為日凡若干錢為緡凡若
干郡守通儀道童公為署祠之扁蔣君偕公八世孫文
英來言曰公之祠于是也久矣若稽歲月記載闕焉不
書諸石曷以永圖願記之澤民惟閒氣哲人學問本乎

六經蹈履合乎仁義元勲鉅德蔑以形容方慶厯中召對天章閣奏十事三曰積貢舉既用其說學校遍天下矧常聘安定胡先生主教吳士嗟乎興學立師羽翼斯道豈淺淺哉祭法禦大災捍大患于一時猶得祀之若公之功施于天下後世豈惟吳學宜祀之凡有學者皆可祀也夫奉祀固以致嚮往隆報効士之朝夕仰瞻又豈無感發其希賢之心者乎澤民風仰公之高風隨牒公之鄉屢常拜公之像今以文字寓名祠下何其幸邪

遂不辭而為之記又明年歲在丁丑正月壬子立石承
德郎平江路總管推官汪澤民為文

新遷范文正公祠記

黎擴

蘇州府學有宋大賢范文正公祠者蓋以公嘗典鄉郡
割所得錢氏南園之地建學而立之也祠及公之子忠
宣恭獻者以其復割前園之地益廣大其基而入之也
祠舊在大成殿之後入路迂曲落地陰潤每經一雨草
輒侵堦以致朔望之晨行香謁虔人跡罕至習為故常

今太守四明姚公堂治蘇之明年政通人和田穀大登
乃嘆曰文正父子建學之功如此其大而其祠屋之地
如此其僻可能報其功之萬一乎于是相址于二門之
內泮池之南入道之右厥位面陽厥土燥剛鳩工築基
卜日遷于其上棟楹梁桷之腐黑者易之蓋瓦級磚之
破缺者補之增以藻飾繚以垣墻書以題扁中塑公像
傍公子神儼然一家之氣象也思昔日范文正公為當
時第一流人物忠義滿朝廷功名滿天下事業滿邊郵

在他邦異域者尚欲效其為人況生于其鄉者乎凡育材于茲學者將以供君上致治之用也必目有所接則心有所動矣而我太守姚公既遷公祠于茲而在學之士出入往來無有不在其目目既有見心可得無動乎必思他日學成材就出為時用以文正父子義下利之心如此可不則而效之乎以文正出將入相之才如此可不企而及之乎以文正先憂後樂之志如此可不力而行之乎效慕于幼學之時致用于壯行之日俾蘇

學之人才益感而益揚者實由乎一遷祠之所致也然則姚公興學作人之功庸有既乎用是勒茲千石以示來者

趙公生祠記

陳仁玉

古者釋奠必有合凡建學先聖先師各因其國之故今郡國祀先賢于學宮猶古志也吳人自言子游氏北學于洙泗以文學稱千數百載間碩大光明卓然見者若陸宣公范文正公至今凜凜生氣文正公以景祐初守

鄉國始建吳學公子純禮元祐中持節過家奏請成之
邦人德焉因並祀之宜也南渡學再建餘百年已弊陋
寶祐三年觀文殿學士趙公與憲再守吳始即泮宮行
鄉飲射禮序賓以賢習鄉尚齒使民知教明年政通惠
洽百廢具舉乃先興學校委校官林君替是究是圖自
殿堂廊廡橫舍撤腐易新或因或革梁于池垣于達臺
于桂亭于芹疏敞儼整光景閑邃設像視聽恍失其舊
增創登俊興賢二齋博士與弟子員講道誼于斯養志

氣于斯魚魚雅雅絃誦清亮相與歎曰誰之賜也于是
欲生祠趙公以公之父正惠公諱希懌舊守是邦廉正
有遺愛法當以所祠范公父子之禮祀之來俾余記或
問生祠古有諸乎曰有昔漢王堂守巴郡吏民生為立
祠韋義為廣都長廣都為生立廟此其始也今為牧守
者生而能以神明自待法施于民澤加于物應祀典矣
豈以在為嫌哉世固有畏威繆敬規以為佞者要諸久
乃見若趙公再世三為守德吳者厚尸而祝之無異詞

者然祠不祠于趙公無豫咨爾學其能砥節礪行立道
成德忠君孝親建功植業增光于前聞人則所以報趙
公者不但香火之情而已也此公修建學宮之本意而
仁玉言之毋忽開慶元年五月丙寅門生通直郎軍器
監丞兼國史實錄院校勘陳仁玉記

高文忠公專祠碑

高若鳳

天地間貞元之會嘗曠世而不一遇其遇之也必有非
常之人出乎其間以為天地立心生民立命以繼絕學

以開太平故孟軻氏云五百年必有王者興其間必有
名世者孟氏以命世之材而不遇貞元之會厥後漢之
興高帝以馬上得天下而有陸賈說以詩書唐之興太
宗定天下秉白旄黃鉞而有房杜以文學為之相三代
而下漢唐有國皆數百年興王之運明良際遇非偶然
也孟氏之說至是而益驗洪惟皇元太祖皇帝以神武
興朔方太宗皇帝夷滅西夏龍戰鷹揚時方以驍勇相
尚而高公智耀獨守儒術隱賀蘭山中太宗雅聞其賢

召見為陳帝王之道驚曰如此好言前此所未聞也世祖皇帝混一朔南尤被寵遇呼為高秀才公專以儒道啟沃聖衷嘗奏儒士師聖人之道今沒為隸不可官為給價贖為良民者凡三千餘又奏儒士教人以禮義宜復其家遂蠲儒徭役且各著于令或以冒議公公曰儒辟則金也謂金色有淺深則可謂非金則不可也上嘉納焉由是許文正公諸儒相繼登崇儒道之顯于皇元實自公發之也世祖皇帝授提刑按察使行且大用尋卒

天下學校不忘公之德與許公並祀公之子睿仕至南臺御史中丞公之孫納琳見任江浙省右丞世共稱其賢朝廷贈公崇文贊治功臣金紫光祿大夫司徒柱國寧國公謚文忠至元後庚辰春正月儒學教授謝亨祖上諸儒議謂諸郡于公皆有專祠且公之子孫世居此邦則公之神游八極昭格貫通寧不眷戀于吳而獨闕然于專祠之奉甚失所以崇明祀之意遂移公牘援杭學例設專祠以春秋仲丁日祭以少牢肖像設主祀事

孔虔且俾余紀之使來者有所攷按禮經法施于民則
祀之以勞定國則祀之今公以儒道佐我太宗皇帝世
祖皇帝使二帝三皇之治三綱五常之道粲然大明于
世則于施民之法定國之勞孰有加于此哉緬惟此邦
在宋仁宗范文正公仲淹以儒術叅大政其子純仁位
至丞相而文正專祀之奉三百年如一日今公之德業
照耀史冊而子孫名位世濟其美與范氏等則此邦有
文正之專祠顯其前有文忠公專祠繼其後二專祠之

奉相為無窮凡過祠下而仰瞻者寧有不起敬而以為
儒道之可尊者乎或曰公之子孫蒸嘗之祭有家廟在
在公寧能舍家廟之祭而歆學校之祀乎曰家所獨也
專祠所同也公之神靈在天下如月在天但有此水即
有此月月之于水豈有所擇乎于是系之詩曰皇奮厥
武威震穹垠天戈所指悉主悉臣不有元哲孰開人文
貞元之會篤生異人隱于賀蘭韞玉席珍赫赫太宗徵
召是勤世皇撫運寵碩殊倫從容獻納非道不陳士脫

因奴儒蠲徭役誦詩讀書人臯家稷茅拔茹連我公是
力惟茲吳會專祠肇闢肖像儼然有嚴有翼祀事孔虔
以報明德勒詩貞珉永永無斁至正元年二月立石

中書右丞浙西道宣慰使游資德生祠記

陳立武


大元混一天下至元乙亥冬師壓吳境今中書右丞浙
西道宣慰使游資德自軍前隻身渡畧約徑抵城下諭
宣聖朝不殺之仁言焉而孚翌日舉城歸附公乃遍歷

閭巷家至戶曉告語諄諄市不易肆民皆按堵咸曰生我者父母也更生者公也既而撫治吳郡安集勞來使寧爾家使畋爾田流逋有歸矜寡有養直枉抑姦扶傷揜骸民生死無憾公之有德于民者甚大至于葺營砦而師之勞者安給糧米而軍之散者聚維揚駐兵飛漕六十餘萬石其在江陰通江者亦餉以二十萬而羸師用宿飽馬騰士歌公之有德于軍者甚深公曰非吾實能乃上恩也歸美報上吾其為士民先乃徧詣緇黃之

居悉奉染盛供設俾各以其教祝天子萬壽興俯跪起
咫尺天威示民有尊咸震咸悚公又曰尊君親上然後
興學古制也曷敢不承暇日下車庠序禮祠先聖勉勵
儒生繼粟繼肉均得其養學舊有田多入于兼井公使
各復歸期于深衣韋帶之士莫不欣戴菁莪樂育之恩
越二稔公持節浙右士吏軍民兒童耆老擁馬首願留
公亦為遲行諭以肅將明命罔敢宿留既視事聲名不
減治郡時吳人之舉手加額曰吳屬郡也猶幸被公之

德于無窮歲壬午春入覲過吳重臨學宮丁寧諸生學
不修且壞吾佐若費因得以葺故益新丹雘炳煥為他
學最政事教化可以並行而不悖矣自昔有大功德者
當世導之百世誦之公之治民似龔黃馭軍似李郭興
學似魯僖對揚王命似召穆公真足以耀當今而垂後
世盛美未述非闕典歟邦之人士相與謀立生祠于學
俾立武屬辭而刻之石學者有天子萬壽之宮凡公之
所以盡忠報國者無非為敬祈億萬斯年之地吾道永

有賴焉祠而祝之夫何慊立武義不敢以蕪陋辭敬撫
其實而書之公名顯字子明汴人也至元十九年正月
人日浙西儒學副提舉陳立武記



吳都文粹續集卷三